

# → KOMENTAR

# Dasar Komuniti Negara perlu lebih inklusif

**D**asar Komuniti Negara digubal Kementerian Perumahan dan Kerajaan Tempatan (KPKT), seterusnya mendapat kelulusan Kabinet pada 23 November 2018 lalu.

Ia bertujuan menangani isu sosial perumahan di peringkat komuniti setempat, khususnya di kawasan perumahan berstrata kos rendah di seluruh negara.

Strategi di bawah dasar ini selaras Rancangan Malaysia Ke-11 (RMK11), Dasar Perumahan Negara 2.0, Dasar Sosial Negara, Rancangan Fizikal Negara Ke-3, Deklarasi Kuala Lumpur 2018 di bawah Agenda Perbandaran Baharu serta Matlamat Pembangunan Lestari (SDGs).

Dasar Komuniti Negara wujud tepat pada masanya dalam membantu pendekatan kerajaan mencorak komuniti di kawasan perumahan berstrata kos rendah di seluruh negara ini.

Ia diharap membantu penduduk memupuk sikap bertanggungjawab dan prihatin di tempat tinggal mereka, serta dapat menikmati kehidupan selesa, selamat dan bersih.

Namun, menjadi persoalan ba-



**Dr Mohd Roslan Rosnon**

Pensyarah Kanan, Fakulti Ekologi Manusia Universiti Putra Malaysia (UPM)

gaimana dasar ini diberi nama atau diangkat sebagai Dasar Komuniti Negara?

## Fahami maksud, sifat berbeza komuniti

Jika hanya tertumpu kepada kawasan perumahan berstrata kos rendah di bandar, bagaimana pula komuniti bandar yang duduk di kawasan komuniti berpagar, komuniti pelarian dan migran seperti tuntutan dalam Agenda Perbandaran Baharu?

Adakah memerlukan satu dasar lain sebagai haluan tindakan oleh kerajaan untuk menangani masalah di negara ini? Justeru, berapa banyak dasar muhu dan perlu dibuat lagi?

Dalam menjayakan Dasar Ko-

muniti Negara supaya lebih bersifat inklusif, KPKT selaku peneraju perlu bekerjasama dengan Kementerian Pembangunan Luar Bandar.

Kita perlu sedar bahawa komuniti bukan sahaja mereka yang tinggal di bandar, tetapi juga di kampung. Kementerian Pembangunan Luar Bandar juga ada melaksanakan Pelan Harapan Pembangunan Luar Bandar 2018-2023, seharusnya menjadi sebahagian Dasar Komuniti Negara.

Oleh itu, Dasar Komuniti Negara seharusnya mencakupi dan merentasi semua jenis komuniti bukan sahaja dari aspek lokaliti, tetapi umur, lokasi, etnik, kepentingan, agama dan kepercayaan serta pekerjaan.

Jika kita berfokus kepada komuniti bandar sahaja, maka dasar ini boleh dinamakan Dasar Komuniti Bandar Negara.

Kita perlu memahami apa dimaksudkan komuniti. Ia perlu dilihat dari sudut pelbagai perspektif, iaitu sebagai komuniti dalam bentuk *association* (persatuan), *territorial unit* (unit kawasan), *community-of-interest* (komuniti berkongsi minat sama), *emotional community* (komuniti secara emo-

si), *legal community* (komuniti perundangan), sistem sosial atau komuniti dalam talian.

Justeru, kita perlu wujudkan Dasar Komuniti Negara yang bersifat komprehensif dan merentasi semua perspektif ini.

## Perluas skop dasar

Sifat setiap komuniti berbeza antara satu dengan yang lain. Perbezaan sifat inilah yang mencorakkan bentuk komuniti yang perlu difahami pemaju atau pekerja komuniti, bagi memudahkannya bertindak apabila muhu bekerja dengan anggota komuniti.

Misalnya, seorang pemaju masyarakat perlu tahu membezakan sifat komuniti bandar dan komuniti desa.

Komuniti yang sejahtera dan padu akan mewujudkan jalinan kerjasama erat serta menggalakkan kehidupan harmoni dan selamat. Turut dinyatakan dalam Dasar Komuniti Negara ini adalah matlamat akhir untuk mewujudkan komuniti dan generasi mampan.

Dalam merealisasikan hasrat ini, komuniti luar bandar juga perlu ditingkatkan dan diperluas struktur ekonominya. Perkara ini

perlu bagi memastikan kelestarian kawasan pinggir dan luar bandar juga dipelihara.

Pada masa sama, kita perlu memelihara kawasan kampung agar kekal menjadi kampung, tetapi memiliki perubahan dari segi ekonomi dan peluang pekerjaan, struktur sosial melalui kebolehcapaian dan keperluan asas yang dilengkapi pelbagai kemudahan.

Oleh yang demikian, dasar ini perlu diperluaskan skopnya kepada kawasan luar bandar dan mencakupi pelbagai jenis komuniti bersesuaian dengan namanya sebagai Dasar Komuniti Negara.

Saya berharap pihak kerajaan memanggil pakar Pembangunan Komuniti di Malaysia termasuk ahli akademik dan penyelidik untuk duduk semeja bagi membincangkan perkara ini.

Penilaian sesuatu dasar yang lama perlu dilakukan sebelum kita membuat dasar baharu. Penambahbaikan dasar juga perlu dilakukan agar memastikan dasar itu mencapai objektifnya.

Janganlah kita asyik memperkenal dasar baharu demi membina legasi tertentu, tanpa ada penilaian dan penambahbaikan daripada dasar sebelum ini.